

piraten.lu

Claude WISELER
Président von der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 05/08/2025

Här President,

Sou wéi den Artikel 80 vun eisem Chambersreglement et virgesäit, bieden ech Iech, dës parlamentaresch Fro un de Minister fir den Interieur weiderzeleeden.

D'POST-Cyberattack huet net nëmmen d'allgemeng Telekommunikatioun zu Lëtzebuerg betraff, mee och kritesch Froen iwwer d'Resilienz vun eisen Noutrouffservicer opgeworf. D'Noutrouffnummern 112 an 113 sinn essenziell fir d'öffentlech Sécherheet, an hir Disponibilitéit muss ënner allen Ëmstänn garantéiert sinn, och wann een Haaptoperateur géif ausfalen. Dës Kéier ass den 112 an 113 glécklecherweis net ausgefall.

D'Konzept vum "Multihoming" – wou ee System iwwer verschidde physisch Verbindungen mat ënnerschiddlechen Operateuren oder Netzwierker verfüügt – ass eng bewäerte Method fir kritesch Infrastrukturen ze schützen. Et ass dofir wichteg ze verstoen, ob eis Noutrouffservicer dësen Niveau vun Diversifikatioun hunn, souwuel iwwer traditionell PSTN-Linne wéi och iwwer modern IP-baséiert Verbindungen.

An deem Zesammenhang wëllt ech dem Minister dës Froe stellen:

1. Ass den 112-Noutrouffservice multihomed, dat heescht huet hie physisch Verbindungen (souwuel PSTN wéi och IP) mat verschiddenen Telekommunikationsoperateurinnen?
2. Gouf während dem POST-Ausfall d'Fonctionalitéit vun de Noutrouffservicer zu all Moment garantéiert, oder gouf et Ënnerbriechungen? Den CGDIS sot bekanntermoossen datt si intern den Ausfall konnte gesinn.
3. Wéi eng technesch Tester gi reegelméisseg gemaach fir d'Resilienz vun de Noutrouffservicer ze verifizéieren?
4. Existéieren national Richtlinnen oder Reglementatiounen déi verlaangen, datt kritesch Servicer wéi Noutrouffzentralen iwwer Verbindungen mat multipelen Operateuren verfügen?
5. Wéi staark sinn eis Noutrouffzentralen vun der POST-Infrastruktur ofhängeg, a gëtt et Pläng, fir dës Risiko weider ze diversifizéieren?
6. Huet et no dem Cyberattack eng Reevaluatioun vun de Sécherheetsprotokollen an de Backup-Systemer vun de Noutrouffservicer ginn?

Mat déiwem Respekt,



CLEMENT Sven
Deputéierten

